

EUSKARA. Era berean, Gorka Aurre abokatu gernikarra Euskara Planen zuzendari izendatzea onartu du

Patxi Goenaga Jaurlaritzako Hizkuntza Politikarako sailburuorde izendatu dute

Xabier Aizpurua ordezkatzuko duela erabaki du Gobernu Batzordeak, Miren Azkarateren proposamenari jarraikiz

Luis Karlos Garcia | GASTEIZ

Eusko Jaurlaritzako Gobernu Batzordeak atzoko bileran onartu zuen Patxi Goenagak (Azpeitia, 1948) Xabier Aizpurua ordezkatzeko Eusko Jaurlaritzako Hizkuntza Politikarako sailburuorde gisa.

EGUNKARIAK duela ia bi hilabete aurreratu zuen Kultura sailburu Miren Azkaratek Goenagari eskaintza egin zuela, eta, oso litekeena zela euskaltzain osoak Aizpuruaren lekukoa hartzea.

Miren Azkaratek konfiantza handiko pertsona hautatu du Jaurlaritzak hurrengo urteetan bultzatuko duen euskararen normalkuntza politika taxutzeko. Izan ere, Kultura sailburuak eta Patxi Goenagak elkar eza-gutzen dute aspalditik, besteak beste Euskaltzaindian urte askotan elkarrekin lan egin dutelako.

Ildo horretan, Goenagaren lehendabiziko erronketako bat Euskara Biziberritzeko Plana garatzea izango da. Plana iazko abenduan sailburuordearen beraren herrian (Azpeitian) jarri zen aurreneko abian.

Bestalde, Kultura Saileko informazio iturriek hedabide honi jakinarazi diote Aizpurua bere lanpostura joango dela atzera, hots, Hizkuntza Politikako zerbitzuburu ariko da berriro ere.

Aizpurua Mari Karmen Garmendia sailburua izandakoaren taldeko gizona zen. Bi urtetik behera eman du Kultura Saileko Hizkuntza Politikarako Sailburuorde izendatzea.

Gorka Aurre, Enkarterrietako euskara teknikaria izandakoa

Era berean, Gobernu Batzordeak atzo onetsi zuen Gorka Aurre (Gernika, 1956) Euskara Planen zuzendari izendatzea. Hala, abokatu bizkaitarrak segida emango dio azkenaldion postuan aritutako Arantza Aurrekoetxeari.

Aurrez euskara teknikaria izan da Enkarterrietako Mankomunitatean. Gainera, Kultura Saileko lege-aholkulari lanak egin zituen bi urtez 90eko hamarkadaren hasieran.

Euskara Planen zuzendari berria irakasle laguntzailea izan da azken lau urteotan Euskal Herriko Unibertsitatean Nazioar-



INAKI URANGA

Patxi Goenaga —bigarrena eskuinetik—, abenduan Azpeitian egindako Euskara Biziberritzeko Planaren ekitaldian. Irudian agertzen dira Jean Haritxelhar —eskuinean— eta Miren Azkarate Kultura sailburua.

teko Zuzenbidearen inguruko alorretan. Halaber, itzulpen lanarekin oso loturik dago Aurre, batez ere legeekin zerikusia duten gaietan.

Euskal Autonomia Erkidego-ko Kultura Sailak bi sailburuorde dituzte (Kultura, Gazteria eta Kirolari buruzkoa; eta Hizkuntza Politikarakoa). Bigarren

sailburuordetza horrek bi zuzendaritza ditu: Euskararen Koordinaketa nahiz Sustapenerakoa eta Euskara Planen ingurukoa.

PATXI GOENAGA EUSKO JAURLARITZAKO HIZKUNTZA POLITIKARAKO SAILBURUORDEA

«Baliabideei ahalik eta etekin handiena ateratzea dut helburu»

L.K.G. | GASTEIZ

Eusko Jaurlaritzako Gobernu Batzordeak izendatu eta ordu gutxi batzuk igarota elkarriketatu du EGUNKARIAK Patxi Goenaga. Planei buruz mintzatzeko «goizegi» bada ere, giza zein diru baliabideen optimizazioa helburu duela esan digu.

■ Nola hartu duzu izendapena?

Ilusioz, baina baita kezka denez ere, izan ere, hizkuntza politikan bereziki gertatzen baita batzuentzat gehiegi dena, beste zenbaitentzat gutxiegi dela. Betiko kontua da: alor hau oso kontuz ibili beharrekoa da, baina ausarta ere izan beharra dago.

Hortaz, kezkatuta hartu dut, ea zenbaiteraino aurkitzen dudan erdiko puntu hori.

■ Zergatik onartu duzu?

Lanpostu zaila da. Beharbada orain arte nengoen tokian askoz ere erosoago egon ninteen alderdi askotatik. Hala ere, kargua onartu dut orain arte ibili naizen alorra utzi (sintaxia, gramatika eta abar) eta euskararen alderdi praktikoa nahiz sozio-linguistikoa muturra sartzeko. Bestalde, nire buruarekiko erronka ere bada. Uste dut aukera eman go didala euskal errealitatea hobeto ezagutzeko.

■ Nola eragin dezake Euskaltzaindian luzaroan aritutako batek Hizkuntza Politika hartzeak?

Euskaltzaindiak Jagon eta Iker sailak ditu, eta ni Iker Sailean aritu izan naiz, baina Euskaltzaindiaren Gobernuan ere hartu dut parte. Hortaz, hizkuntzaren beraren kalitateaz ardura hartzeko modua eman dit, eta horrexek eragina izango du orain noan postuan. Zereginik egon baitago euskararen ezarpenean nahiz erabilera zabaltzean, baina, era berean, eta ez da ia honetaz hitz egiten, kalitatearen alde; izaera hori oso zaintzeko moduko kontua du euskarak.

■ Zein premia ditu gaur egun hizkuntza politikak?

Premiak daude bi aldeetatik. Zabalkundea, geroz eta hitzuntun gehiago izatea, oso ga-

rrantzitsua da. Baina nik esan ohi dut niretzat garrantzi gehiago daukala eremu euskaldunean hitzuntun bat galtzea, erdal gunetan irabazten denak baino. Horrek kalitatearekin zerikusia dauka. Zenbait esparrutan euskara atzeraka ari delako, egundoko higadura jasanda, eta hori ere erabileraren kontua da.

■ Zein lan irizpide izango duzu nagusi?

Erabiltzen ari diren bitartekoak ez dakit nahiko diren, ziur aski ez, baina bitarteko horiei ahalik eta etekin handiena ateratzea da nire asmoa. Esate baterako, bilatu beharko da formula bat ehun emanez gero beste horrenbeste etekin lortzeko. Alegia, nahiko nuke alferrik ez galtzea ez indarririk, ez giza baliabiderik, ez dirurik. Bestalde, bistan da, gaur egun dagoenaren gainean abiatu behar da, hobetu beharrekoa iri heldu aurretik.

SOS LAIA

PATXI GOENAGA

(HIZKUNTZA POLITIKAKO SAILBURUORDEA)

Azkarateren konfiantzakoa

Patxi Goenaga (Azpeitia, 1948) Euskaltzaindiako euskaltzain oso izendatu zuten 1995ean, Miren Azkaratek eta beste batzuek babestutako hautagaitzan zelarik. Zazpi urteren buruan, Jaurlaritzako Kultura kontseilariak berak ere sostengatutako eskaintzak Hizkuntza Politikarako sailburuordezara eramandu. Azkaratek eta Goenagak ederki dakite elkarrekin lan egiten, Akademiaren 90eko hamarkadan egin zuten. Goenagak Jesusen Lagundian ikasi zuen 28 urte izan arte. Euskaltzaindiaz gain, Unibertsitate lanari atxeki izan zaio, eta, Arabako kanpuseko errektoreordea izan zen 1991tik 1995era. Puntakoa aditua da euskararen sintaxian.